

**ХУУЛЬ ЗҮЙН БАЙНГЫН ХОРООНЫ
ХУРАЛДААНЫ ТЭМДЭГЛЭЛИЙН АГУУЛГА
2023 оны 06 дугаар сарын 27-ны өдөр, Мягмар гараг**

Хуралдааны тэмдэглэлийн агуулга

Хуралдааны товч тэмдэглэл:	1-23
Хуралдааны дэлгэрэнгүй тэмдэглэл:	24-67

1.Нийтийн албанд нийтийн болон хувийн ашиг сонирхлыг зохицуулах, ашиг сонирхлын зөрчлөөс урьдчилан сэргийлэх тухай хуульд нэмэлт, өөрчлөлт оруулах тухай хуулийн нэгтгэсэн төсөл болон хамт өргөн мэдүүлсэн хуулийн төслүүд /Улсын Их Хурлын гишүүн Ш.Адъяаа 2022.12.30-ны өдөр, Засгийн газар 2023.01.18-ны өдөр тус тус өргөн мэдүүлсэн, эцсийн хэлэлцүүлэг/	24-28
2.“Авлигатай тэмцэх үндэсний хөтөлбөр батлах тухай” Улсын Их Хурлын тогтоолын төсөл /Засгийн газар 2023.06.16-ны өдөр өргөн мэдүүлсэн, анхны хэлэлцүүлэг/	26-46
3.“Тогтоолд өөрчлөлт оруулах тухай” Улсын Их Хурлын тогтоолын төсөл	46
4.Монгол Улсын дээд шүүх, Шүүхийн ерөнхий зөвлөл, Шүүхийн сахилгын хороо болон Хүний эрхийн Үндэсний комиссын 2024 оны төсвийн төслийн талаар хэлэлцэх	46-66
5.Байнгын хорооны тогтоолын төсөл /Улсын дээд шүүхийн шүүгчид нэр дэвшигчтэй хийх нэр дэвшигчийн сонсголын тов тогтоох, сонсгол даргалагчийг сонгох тухай/	66-67

***Монгол Улсын Их Хурлын 2023 оны хаврын ээлжит чуулганы
Хууль зүйн байнгын хорооны 06 дугаар сарын 27-ны өдөр
/Мягмар гараг/-ийн хуралдааны товч тэмдэглэл***

Байнгын хорооны дарга Б.Энхбаяр ирц, хэлэлцэх асуудлын дарааллыг танилцуулж, хуралдааныг даргалав.

*Хуралдаанд ирвэл зохих 19 гишүүнээс 10 гишүүн хүрэлцэн ирж, 52.6 хувийн ирцтэйгээр хуралдаан 11 цаг 00 минутад Төрийн ордны “Их засаг” танхимд эхлэв.
Томилолттой: Ш.Адьяа, Э.Бат-Амгалан, С.Бямбацогт, Б.Дэлгэрсайхан, Х.Нямбаатар, Б.Пүрэвдорж, Н.Учрал, Б.Энх-Амгалан;
Чөлөөтэй: Ц.Сэргэлэн.*

Нэг.Нийтийн албанд нийтийн болон хувийн ашиг сонирхлыг зохицуулах, ашиг сонирхлын зөрчлөөс урьдчилан сэргийлэх тухай хуульд нэмэлт, өөрчлөлт оруулах тухай хуулийн нэгтгэсэн төсөл болон хамт өргөн мэдүүлсэн хуулийн төслүүд /Улсын Их Хурлын гишүүн Ш.Адьяа 2022.12.30-ны өдөр, Засгийн газар 2023.01.18-ны өдөр тус тус өргөн мэдүүлсэн, эцсийн хэлэлцүүлэг/

Хэлэлцэж буй асуудалтай холбогдуулан Хууль зүй, дотоод хэргийн яамны Төрийн нарийн бичгийн дарга П.Сайнзориг, мөн яамны Хууль зүйн бодлогын газрын ахлах шинжээч Ш.Цолмон, шинжээч М.Цолмон, Монголбанкны Удирдлага, төлөвлөлтийн газрын мөнгө угаах терроризмыг санхүүжүүлэхтэй тэмцэх асуудал хариуцсан ахлах референт Б.Гантуяа, Авлигатай тэмцэх газрын Хяналт шалгалт, дүн шинжилгээний хэлтсийн Мэдүүлгийн бүрдүүлэлт, дүн шинжилгээний албаны дарга Б.Баярсайхан нар оролцов.

Хуралдаанд Улсын Их Хурлын Тамгын газрын Хууль, эрх зүйн газрын Зөвлөхүүдийн албаны зөвлөх А.Болортуяа, мөн газрын Байнгын хорооны асуудал хариуцсан хэлтсийн Төрийн байгуулалтын байнгын хороо хариуцсан ахлах зөвлөх Б.Хатантуул, Хууль зүйн байнгын хороо хариуцсан референт П.Хулан, Хяналт шалгалт, үнэлгээний газрын Төсвийн хяналт, шинжилгээний хэлтсийн референт С.Төрмөнх нар байлцав.

Төслийг эцсийн хэлэлцүүлэгт бэлтгэсэн талаарх ажлын хэсгийн танилцуулгыг ажлын хэсгийн ахлагч, Улсын Их Хурлын гишүүн Ж.Сүхбаатар танилцуулав.

Танилцуулгатай холбогдуулан Улсын Их Хурлын гишүүн Д.Ганбатын тавьсан асуултад Хууль зүй, дотоод хэргийн яамны Төрийн нарийн бичгийн дарга П.Сайнзориг,

Авлигатай тэмцэх газрын Хяналт шалгалт, дүн шинжилгээний хэлтсийн Мэдүүлгийн бүрдүүлэлт, дүн шинжилгээний албаны дарга Б.Баярсайхан нар хариулж, тайлбар хийв.

Улсын Их Хурлын гишүүн, ажлын хэсгийн ахлагч Ж.Сүхбаатар дахин санал хураалт явуулах горимын санал гаргав.

Монгол Улсын Их Хурлын чуулганы хуралдааны дэгийн тухай хуулийн 42 дугаар зүйлийн 42.2.3-т “нэгдсэн хуралдааны анхны хэлэлцүүлгээр санал хурааж дэмжигдсэн боловч уг саналаар Байнгын хорооны хуралдаанд оролцсон гишүүдийн гуравны хоёроос доошгүй нь дахин санал хураалгах шаардлагатай гэж үзсэн” гэж заасны дагуу санал хураалт явуулав.

Б.Энхбаяр: Улсын Их Хурлын гишүүн Ж.Сүхбаатарын гаргасан дахин санал хураалгах шаардлагатай гэсэн горимын саналыг дэмжье гэсэн санал хураалт явуулъя.

Зөвшөөрсөн: 8
Татгалзсан: 2
Бүгд: 10
80.0 хувийн саналаар горимын санал дэмжигдлээ.

Б.Энхбаяр: Улсын Их Хурлын гишүүн Ж.Сүхбаатарын гаргасан, 1.Төслийн 1 дүгээр зүйлийн 20¹.1 дэх хэсгийн “Засаг даргын албан тушаал эрхэлж байгаа хүн” гэснийг “Засаг дарга” гэж өөрчилж, “хөтөлбөр” гэсний дараах “эсхүл” гэснийг хасаж, 20¹.3, 29.6 дахь хэсгийн “20¹ дүгээр зүйлд” гэснийг “20¹.1, 20¹.2-т” гэж өөрчилж, мөн 29.6 дахь хэсгийн “төр,” гэснийг хасаж, “төслийн 2 дугаар зүйлийн мөн хэсгийн “дарга,” гэсний өмнө “байгууллагын” гэж “тэдгээрийн” гэсний дараа “тэргүүн дэд дарга, дэд дарга” гэж, “орлогч” гэсний дараа “дарга” гэж нэмэх гэснийг “мөн хэсгийн “аймаг, нийслэлийн Засаг дарга” гэсний өмнө “тэдгээрийн тэргүүн дэд дарга, дэд дарга, орлогч дарга,” гэж,” өөрчлөх гэсэн саналыг дэмжье гэсэн санал хураалт явуулъя.

Зөвшөөрсөн: 8
Татгалзсан: 2
Бүгд: 10
80.0 хувийн саналаар дэмжигдлээ.

Байнгын хорооноос гарах танилцуулгыг Улсын Их Хурлын гишүүн, ажлын хэсгийн ахлагч Ж.Сүхбаатар Улсын Их Хурлын чуулганы нэгдсэн хуралдаанд танилцуулахаар тогтов.

Уг асуудлыг 11 цаг 16 минутад хэлэлцэж дуусав.

МОНГОЛ УЛСЫН ИХ ХУРАЛ

2023 оны 06 дугаар сарын 27-ны өдөр,
Мягмар гараг
Төрийн ордон “Их засаг” танхим
11 цаг 00 минут.

ХУУЛЬ ЗҮЙН БАЙНГЫН ХОРООНЫ ХУРАЛДААНЫ ДЭЛГЭРЭНГҮЙ ТЭМДЭГЛЭЛ

Б.Энхбаяр: Хууль зүйн байнгын хорооны 2023 оны 6 дугаар сарын 27-ны өдрийн хуралдаан гишүүдийн олонх ирсэн тул нээснийг мэдэгдье.

Хуралдааны ирцийг танилцуулъя. Энхбаяр гишүүн ирсэн байна, Адьяаа гишүүн гадаад томилолттой, Алтанхуяг гишүүн ирсэн байна, Бат-Амгалан гишүүн гадаад томилолттой, Бямбацогт гишүүн гадаад томилолттой, Ганбат гишүүн ирсэн байна, Дэлгэрсайхан гишүүн гадаад томилолттой, Мөнхбаатар гишүүн ирсэн байна, Мөнх-Оргил гишүүн ирсэн байна, Мөнхцэцэг гишүүн ирсэн байна, Нямбаатар гишүүн гадаад томилолттой, Пүрэвдорж гишүүн гадаад томилолттой, Раднаасэд гишүүн ирсэн байна, Сандаг-Очир гишүүн ирсэн байна, Сүхбаатар гишүүн ирсэн байна, Сэргэлэн гишүүн чөлөөтэй, Учрал гишүүн гадаад томилолттой, Цогтбаатар гишүүн ирсэн байна, Энх-Амгалан гишүүн гадаад томилолттой.

Байнгын хорооны хуралдааны ирцийг танилцуулж дууслаа. Байнгын хорооны хуралдаанаар хэлэлцэх асуудлыг танилцуулъя.

1.Нийтийн албанд нийтийн болон хувийн ашиг сонирхлыг зохицуулах ашиг сонирхлын зөрчлөөс урьдчилан сэргийлэх тухай хуульд нэмэлт, өөрчлөлт оруулах тухай хуулийн нэгтгэсэн төсөл болон хамт өргөн мэдүүлсэн хуулийн төслийн эцсийн хэлэлцүүлгийг хийнэ.

2.Авлигатай тэмцэх үндэсний хөтөлбөр батлах тухай Улсын Их Хурлын тогтоолын төсөл, Засгийн газраас 2023 оны 6 сарын 16-ны өдөр өргөн мэдүүлсэн эхний хэлэлцүүлгийг хийнэ.

3.“Тогтоолд өөрчлөлт оруулах тухай” Улсын Их Хурлын тогтоолын төсөл.

4-т. Монгол Улсын дээд шүүх, Шүүхийн ерөнхий зөвлөл, Шүүхийн сахилгын хороо болон Хүний эрхийн комиссын 2024 оны төсвийн төслийн талаар хэлэлцэнэ.

5.Улсын дээд шүүхийн шүүгчид нэр дэвшигчтэй хийх нэр дэвшигчийн сонсголын тов тогтоох, сонсгол даргалагчийг сонгох тухай Байнгын хорооны тогтоолын төслийг хэлэлцэнэ.

Хэлэлцэх асуудал дээр саналтай гишүүн байна уу. Алга байна. Хэлэлцэх асуудалдаа оръё.

Нийтийн албанд нийтийн болон хувийн ашиг сонирхлыг зохицуулах ашиг сонирхлын зөрчлөөс урьдчилан сэргийлэх тухай хуульд нэмэлт, өөрчлөлт оруулах тухай хуулийн нэгтгэсэн төсөл болон хамт өргөн мэдүүлсэн хуулийн төслийн эцсийн хэлэлцүүлгийг явуулъя.

Хуулийн төслийг эцсийн хэлэлцүүлэгт бэлтгэсэн талаарх ажлын хэсгийн танилцуулгыг ажлын хэсгийн ахлагч, Улсын Их Хурлын гишүүн Сүхбаатар танилцуулна.

Ж.Сүхбаатар: Байнгын хорооны дарга, эрхэм гишүүд ээ,

Улсын Их Хурлын гишүүн Адьяаагаас 2022 оны 12 дугаар сарын 30-ны өдөр, Монгол Улсын Засгийн газраас 2023 оны 1 дүгээр сарын 18-ны өдөр Улсын Их Хуралд тус тус өргөн мэдүүлсэн Нийтийн албанд нийтийн болон хувийн ашиг сонирхлыг зохицуулах

ашиг сонирхлын зөрчлөөс урьдчилан сэргийлэх тухай хуульд нэмэлт, өөрчлөлт оруулах тухай хуулийн төслүүд болон хамт өргөн мэдүүлсэн хуулийн төслийг нэгтгэсэн төслийн анхны хэлэлцүүлгийг Улсын Их Хурал 2023 оны 6 дугаар сарын 22-ны өдрийн чуулганы нэгдсэн хуралдаанаараа хийж, эцсийн хэлэлцүүлэгт бэлтгүүлэхээр Хууль зүйн байнгын хороонд шилжүүлсэн билээ.

Нэгдсэн хуралдааны анхны хэлэлцүүлгээр олонхын дэмжлэг авсан саналыг төслийн холбогдох зүйл, хэсэгт нэмж тусган төслийн агуулга, бодлого, зарчмыг алдагдуулахгүйгээр үг хэллэг, хэл найруулга, дэс дараалал, бүтцийн шинжтэй засварыг хийж эцсийн хэлэлцүүлэгт бэлтгэсэн хуулийн төслүүдийг та бүхэнд тараасан болно.

Хүчин төгөлдөр мөрдөгдөж буй Нийтийн албанд болон нийтийн болон хувийн хувийн хэвшлийг зохицуулах, ашиг сонирхлын зөрчлөөс урьдчилан сэргийлэх тухай хуулийн нэр томъёотой нэгтгэсэн хуулийн төслийг нийцүүлэх үүднээс анхны хэлэлцүүлгээр дэмжигдсэн найруулгын саналыг Монгол Улсын Их Хурлын чуулганы хуралдааны дэгийн тухай хуулийн 42 дугаар зүйлийн 42.2.3-т заасны дагуу Байнгын хорооны хуралдаанд оролцсон гишүүдийн 2/3-оос доошгүйн саналаар дахин санал хураалгах санал гаргаж байна.

1.Төслийн нэг дүгээр зүйлийн хорийн нэг иттрих нэг дэх хэсгийн Засаг даргын албан тушаал эрхэлж байгаа хүн гэснийг Засаг дарга гэж өөрчилж, хөтөлбөр гэсний дараах эсхүл гэснийг хасаж, хорийн нэг иттрих гурав, хорин есийн зургаа дахь хэсгийн хорийн нэг иттрих нэг дүгээр зүйлд гэснийг хорийн нэг иттрих нэг, хорийн нэг иттрих хоёрт гэж өөрчилж, мөн хорин есийн зургаа дахь хэсгийн төр, гэснийг хасаж, төслийн хоёр дугаар зүйлийн мөн хэсгийн дарга, гэсний өмнө байгууллагын гэж, тэдгээрийн гэсний дараа тэргүүн дэд дарга, дэд дарга гэж, орлогч гэсний дараа дарга гэж нэмэх гэснийг мөн

хэсгийн аймаг, нийслэлийн Засаг дарга гэсний өмнө тэдгээрийн тэргүүн дэд дарга, дэд дарга, орлогч дарга, гэж нэмэх гэж өөрчлөх. Хэлэлцэн шийдвэрлэж өгөхийг хүсье.

Анхаарал тавьсанд баярлалаа.
Манай хэд нэг ийм.

Б.Энхбаяр: Байнгын хороонд хэлэлцэж байгаа асуудалтай холбоотойгоор хуралдаанд оролцож байгаа албан тушаалтнуудыг танилцуулья.

Сайнзориг Хууль зүй, дотоод хэргийн яамны Төрийн нарийн бичгийн дарга, Д.Цолмон Хууль зүй, дотоод хэргийн яамны Хууль зүйн бодлогын газрын дарга, Б.Гантуяа Монголбанкны Удирдлага, төлөвлөлтийн газрын мөнгө угаах терроризмыг санхүүжүүлэхээр тэмцэх асуудал хариуцсан ахлах референт, Баярсайхан Авлигатай тэмцэх газрын Хяналт шалгалт, дүн шинжилгээний хэлтсийн Мэдүүлгийн бүрдүүлэлт дүн шинжилгээний албаны дарга, Ш.Цолмон Хууль зүй, дотоод хэргийн яамны Хууль зүйн бодлогын газрын ахлах шинжээч, М.Цолмон Хууль зүй, дотоод хэргийн яамны Хууль зүйн бодлогын газрын шинжээч гэсэн албан тушаалтнууд оролцож байна.

Байнгын хороонд хуулийн төслийг эцсийн хэлэлцүүлэгт бэлтгэсэнтэй холбоотойгоор асуух асуулттай гишүүд нэрсээ өгнө үү. Ганбат гишүүнээр тасаллаа. Ганбат гишүүн асуултаа асууя.

Д.Ганбат: Байнгын хорооны гишүүдийнхээ амар, амгаланг айлтгая. Энэ Авлигатай тэмцэх өнөөдрийн энэ хэлэлцэж байгаа асуудал бол чухал асуудал гэж ойлгож байна. Энэ хуулийг бол батлах хэрэгтэй. Батлахыг нь дэмжиж байна. Хэд хэдэн хоёр, гурван асуулт байна надад.

Нэгдүгээрт энэ нийтийн ашиг сонирхол энэ асуудлаар хэдий хэмжээний

хүн Авлигатай тэмцэх газарт байцаагдаж байна вэ нэгдүгээр асуулт.

бүрдүүлэлт, дүн шинжилгээний албаны дарга Баярсайхан байна.

Хоёрдугаар асуулт энэ орон нутагт, аймагт тендер шалгаруулалт хэдэн хувь нь явагдаж байна. Тэгээд тэрэнтэй холбоотойгоор ямар ямар ашиг сонирхлын зөрчил гарч байна вэ. Энэ талаар судалгаа тооцоо байна уу. Ихэнх аймгийн Засаг дарга нар, дунд тушаалын төрийн албан хаагчид тендер шалгаруулдаг, тендерт оролцдог энэ улсууд маань бас ард олон нийттэй ингээд иргэдтэй уулзаад явж байхад маш их шүүмжлэлтэй байгаа. Маш их хэл амтай. Тэр тендер шалгаруулалтыг нь авдаг цөөхөн хэдэн компаниуд байдаг. Тэгээд барьж байгуулсан объектууд нь чанарын шаардлага хангахгүй, сургуулийн хүүхдийн дотуур байр энэ тэр гэхэд хамгийн чанар муутай, хамгийн муу материалаар хийсэн ийм зүйлүүд байна. Тэгээд өөрөө тэр аймгийн удирдлагууд нь гэхэд бол орон нутагт дандаа уурын зуухтай ч юм уу, төсвөөс санхүүждэг тийм юмыг хувьчлаад авчихсан, эзэмшихсэн.

Нөгөө талаар болохлоор тэр зам, гүүрний ашиглалтын компаниуд тэнд ингээд хувьтай ажиллуулдаг ийм улсууд байдаг. Энэ юмнууд энүүгээр ингээд зогсох уу, тэрийг зохицуулах уу, тэр хүмүүс бол ах дүү, төрөл саднаас гадна бас өөрсдийн хувь эзэмшдэг компаниараа дамжуулаад энэ нийтийн ашиг сонирхол энэ төрийн үйлчилгээний ажилд дангаараа оролцоод явдаг иймэрхүү зүйлүүд байна гэж ойлгож байгаа. Энэ талаар надад тодруулаад, хариулаад энэ хуультай холбогдох уу, уягдах уу гэдгийг бас тодруулж өгөөч гэж хүсэж байна.

Б.Энхбаяр: 2 номерын микрофон хариулъя. Нэр, албан тушаалаа танилцуулаад Ганбат гишүүний асуултад хариулъя.

Б.Баярсайхан: Ганбат гишүүний асуултад хариулъя. Авлигатай тэмцэх газрын Хяналт шалгалт, дүн шинжилгээний хэлтсийн Мэдүүлгийн

Нийтдээ 2022 оны байдлаар Авлигатай тэмцэх газарт 1520 эрүүгийн гэмт хэрэг, авлига албан тушаалын гэмт хэрэг шалгагдсан. Үүнээс төрийн албан тушаалтан албаны эрх мэдэл буюу албан тушаалын байдлаа урвуулах гэмт хэрэгт нийтдээ 1011 байгаа. Энэ хэрэгт холбогдсон албан тушаалтнуудын хувьд бол 1184 албан тушаалтан энэ дээр холбогдсон байгаа.

Манайхаас бас гэмт хэргээс гадна авлига, ашиг сонирхлын зөрчилтэй холбоотой гомдол, мэдээллийг шалгадаг байгаа. Энэ гомдол, мэдээллээс ингээд аваад үзэхээр багагүй хувь нь бол албаны эрх мэдлээ урвуулсан, хэтрүүлсэн ийм гомдол, мэдээллүүд байгаад байгаа юм. Өөрөөр хэлбэл энэ нийт энэ 2022 онд шалгасан 653 өргөдөл, гомдол, мэдээллийн 112 нь албаны эрх мэдлээ урвуулсан, хэтрүүлсэн, хууль бус шийдвэр гаргаж бусдад давуу байдал олгосон ийм асуудлууд байгаад байгаа юм.

Тэгэхээр энэ ашиг сонирхолтой холбоотой энэ асуудлуудыг зайлигүй зохицуулах шаардлагатай гэж харж байна. Хариуллаа.

Б.Энхбаяр: Ганбат гишүүн тодруулж асууя.

Д.Ганбат: Уул нь би их маш тодорхой асуултууд асуусан. Болохгүй бол чуулган дээр энэ миний асуултад бэлдээд ирээрэй. Тэр юм хумаа үзэж хараад. Би давтаж асууна шүү. Энийг бүүр тэртээ тэргүй хүмүүс хараад бас сонсохыг хүсээд сууж байгаа. Нэг.

Хоёрдугаарт энэ өөрийнхөө ашиг сонирхол, хөрөнгө орлогынхоо мэдүүлэг ингээд өгч байгаа албан тушаалтнууд байгаа гэж ойлгож байна Авлигатай тэмцэх газар. Авлигатай тэмцэх газрын өөрийнхөн нь хөрөнгө орлогын мэдүүлгээ бас хаана, яаж өгөөд байгаа билээ, хэдий хэмжээний хүмүүс хамрагдаж байна.

Энэ олон тооны хөрөнгө орлогын мэдүүлгийг байнга хянаад байж чадаж байгаа юу, хэдийд. Тэгээд нөгөө талаар энэ хууль маань батлагдаад ердийн журмаараа үйлчлэх гээд байна уу, нөгөө төрийн мэдээлэлд гараад 10 хоносны дараа юу. Эсвэл тодорхой хугацаанаас эхэлж үйлчлэх юм уу.

Б.Энхбаяр: 2 номерын микрофон Сайнзориг дарга хариулъя.

П.Сайнзориг: Хурал даргалагч зөвшөөрвөл бас эхний асуулт дээр бас АТГ бас нэмээд тодруулж хариулъя гэнэ.

Ганбат гишүүний асуултад хариулъя. Хоёр дахь асуулт буюу энэ ердийн журмаар үйлчлээд явна. Өөрөөр хэлэх юм бол “Төрийн мэдээлэл” сэтгүүл дээр хэвлэгдээд энэ хууль маань хүчин төгөлдөр, 10 хоногийн дараагаас хүчин төгөлдөр болно. Тодорхой асуудлууд дээр дагаж мөрдөх журмын зохицуулалт байгаа. Ажил эрхлэхтэй холбоотой асуудлууд.

Ер нь зүгээр өмнө нь хууль тогтоомжид нийцүүлж байгуулагдсан гэрээ, хэлцлийн хувьд бол энэ хуулийн үйлчлэл бол хамаарахгүй. Ийм байдалтай буюу тухайн харилцааг үргэлжлээд гэрээнийхээ заасныхаа дагуу харилцан гүйцэтгэлээ хийгээд дуусгавар болгох ийм зохицуулалт дагаж мөрдөх шилжилтийн ийм зохицуулалт дээр орсон байна.

Эхний асуулт дээр Баярсайхан.

Б.Баярсайхан: Эхний асуултад хариулъя. Нийтдээ улсын хэмжээнд 50 орчим мянган албан тушаалтан хувийн ашиг сонирхлын болон хөрөнгө орлогын мэдүүлгээ гаргаад явж байгаа. Авлигатай тэмцэх газраас бол 170 орчим албан.../минут дуусав./

Б.Энхбаяр: Ганбат гишүүний бас асуултад чуулган дээр, нэгдсэн чуулган бас маргааш энэ асуудлыг хэлэлцэнэ. Энэ дээр бас нэмж тодруулж хариулаарай.

Гишүүд асуулт асууж дууслаа.

Ажлын хэсгээс боловсруулсан зарчмын зөрүүтэй саналаар санал хураалт явуулна. 1 санал байгаа. Ажлын хэсгийн ахлагч Сүхбаатар, Улсын Их Хурлын чуулганы хуралдааны дэгийн тухай хуулийн 42.2.3-т нэгдсэн хуралдааны анхны хэлэлцүүлгээр санал хурааж дэмжигдсэн боловч уг саналаар Байнгын хорооны хуралдаанд оролцсон гишүүдийн 2/3-оос доошгүй нь дахин санал хураалгах шаардлагатай гэж үзсэн, гэж заасны дагуу 2/3-оор дэмжигдэх учиртай санал хураалт байгаа гэдгийг гишүүддээ хэлье. Сүхбаатар гишүүний микрофоныг өгье.

Ж.Сүхбаатар: Түрүүн тэр нөгөө манайд бас байгууллагын гэсний нь дарга гээд тавьчихсан шүү дээ. Тэр дарга гэдэг нь бас олон юмтай давхардаад явчихсан юм шиг байна лээ. Тэгээд манай хэд тээ. Тэгээд бас жсоохон, жижигхэн тийм алдаатай тодотгол юмнуудаа засаад 2/3-оор хийх найруулгын л юм байгаа юм. Өөр бол зарчмын тийм агуулга байхгүй.

Тэгэхээр төслийн нэг дүгээр зүйлийн хорийн нэг итрих нэг дэх хэсгийн Засаг даргын албан тушаал эрхэлж байгаа хүн гэснийг Засаг дарга гэж өөрчлөх, хөтөлбөр гэсний дараах эсвэл гэснийг хасаж, хорийн нэг итрих гурав, хорин есийн зургаа дахь хэсгийн хорийн нэг итрих дүгээр зүйлд гэснийг хорийн нэг итрих нэг, хорийн нэг итрих нэг, хоёрт гэж өөрчилж, мөн хорин есийн зургаа дахь хэсгийн төр, гэснийг хасаж, төслийн хоёр дугаар зүйлийг мөн хэсгийн дарга, гэсний өмнө байгууллагын гэж тэдгээрийн гэсний дараа тэргүүн дэд дарга, дэд дарга гэж, орлогч гэсний дараа дарга гэж нэмэх гэснийг мөн хэсгийн аймаг, нийслэлийн Засаг дарга гэсний өмнө тэдгээрийн тэргүүн дэд дарга, дэд дарга, орлогч дарга гэж нэмэх гэж өөрчлөх гээд дарга гэдэгтэй нь холбоотойгоор ингээд тодотгоод явчихсан юмнууд байж байгаа. Энийг хураалгаж өгөх асуудал байгаа.

Б.Энхбаяр: Саяын Сүхбаатар гишүүний уншиж танилцуулсан зүйлийг эхлээд бол горимын саналаар санал хураана. Энэ бол 2/3 байгаа. Саяын найруулгын шинжтэй өөрчлөлтийг ер нь санал хураах нь зүйтэй гэдэг горимын саналаар эхлээд санал хураая. Санал хураалт.

80 хувийн саналаар санал дэмжигдлээ. Горимын санал дэмжигдсэн учраас сая ажлын хэсгээс уншиж танилцуулсан зарчмын зөрүүтэй саналаар санал хураалт явуулъя. Санал хураалт.

80 хувиар санал дэмжигдлээ. Санал хураалт явуулж дууслаа.

Нийтийн албанд нийтийн болон хувийн ашиг сонирхлыг зохицуулах, ашиг сонирхлын зөрчлөөс урьдчилан сэргийлэх тухай хуульд нэмэлт, өөрчлөлт оруулах тухай хуулийн нэгтгэсэн төсөл болон хамт өргөн мэдүүлсэн хуулийн төслийн эцсийн хэлэлцүүлгийг явуулж дууслаа.

Хуулийн төслийг эцсийн хэлэлцүүлэгт бэлтгэсэн талаарх Байнгын хорооны танилцуулгыг чуулганы нэгдсэн хуралдаанд Улсын Их Хурлын гишүүн Сүхбаатар танилцуулна. Дараагийн асуудалдаа оръё.

11.16 цаг